

# Te parau tuatapapa a te

(Atete 1991-  
Thurat 1992)

## OMUARAA

I te mau auvaha o te Apooraa Rahi Amui,

la ora na i te aroha o te Atua i to tatou farerei-faahou-raa i teie matahiti 1992!

1. Teie nei parau tuatapapa, e ere ia i te hoè parau tuatapapa o te faaite ra i te manao amui o te hoè pupu taata i mua i te hoè mau ohipa i orahia mai, o te orahia ra e aore ia o ta ratou e manaonao ra no te tau e haerehia atura e ratou! E parau tuatapapa ra na te hoè taata e vai ra i roto i te hoè amuiraa taata faataahia i roto i te hoè area taime no te apee e no te ara i nià i te tere o te hoè nunaa e titau ra i te hoè fenua api. Ua tiatūri o ia i te faufaa-rahi no te mana faaoti o te pupu no te horoāraa i te hoè reni arataira i taua nunaa ra i roto i to na tere, ua ite atoā rā o ia i te faufaa-rahi, no taua pupu ra e aratai ra i taua nunaa ra te parau o to te taata tatai-tahi parauraa i te mau manao atou e vai ra i roto i to na auu e nehenehe hoi e turu i te nunaa i roto i to na tere.

2. No reira, eita teie nei parau tuatapapa i ta ū e riro ei parau tuatapapa o te faaite mai i te mau mea atoā i orahia mai e tatou i te matahiti i raterahia mai e tatou, i te hoè noa rā mau vahi o te faatupu mai i te manaō uiui i roto i te auu e te manaonaoāraa atu i te parau no te tere e no te faaiteraa a te Etaretia i to na faaroo i roto i te nunaa o to tatou fenua, i roto i teie mau pae motu i Patitifa nei e i roto hoi i teie nei ao, i te roaraa no teie tau o ta tatou e haere atu nei. O to ū la hinaaro na roto i teie nei parau tuatapapa i ta ū.

## TE HOE PUPU API...

1. I te Apooraa Rahi Amui no te matahiti i mairi aè nei, i haamau na tatou i te hoè Apooraa Faatere api no te faaohiparaa i te mau faaotira a te Apooraa Rahi Amui e no te mono-atoā-raa hoi i te Apooraa Rahi Amui i roto i te area o na putuputuraa a te Apooraa Rahi Amui. Te turuhia nei rā te Apooraa Faatere e te hoè tomite nainai no te faaotira a te mau parau rii e fā mai i roto i te area o ta na mau putuputuraa.

2. I te matahiti atoā i mairi aè nei to te Apooraa Rahi Amui haamana-raa i te "tapura ohipa" (cahier des charges) a te feia e rave tamau ra i te ohipa i te pū no te Faatereraa nei mal ta te peretiteni e te mono-peretiteni, ta te papai-parau rahi e te haapao-faufaa o te Etaretia, toe noa atu ai ta te haapao-puta faufaa, o te nehenehe rā e faaravai i roto i te faaohiparaa.

3. Te vahi api rā e itea ra i roto i taua faataaraa tapura ohipa ra a te Apooraa Rahi Amui i te matahiti i mairi aè nei, o to te hoè ia tino faataaraa-hia no te faaara e no te faaitoito-faafou-raa i te hoè mau tomite ohipa a te Etaretia e taoto noa ra, ia riro mau ratou, ma te tiatūrihia e te faaturahia, ei mau tomite tei turu e tei haapao i te hoè tuhaa ohipa no te oraraa o te Etaretia. Te ohipa maite nei taua tino ra ma te vahi te nehenehe ia na, i te mea e, i pihai iho i taua tapura ohipa ra i faataahia na na, ia au i to na tiāraa peretiteni-mono no te Etaretia, te vai atoā ra te tapura ohipa no te tiāraa peretiteni-Tuhaa i faataahia na na ... Eita rā e nehenehe ia tatou i teie nei ia horoā i te hoè mau manao faaravai i nià i te tapura ohipa i faataahia e te Apooraa Rahi Amui na teie pupu rave ohipa e rave tamau ra i te ohipa i te pū no te Faatereraa, i te mea e, e pupu api teie o te haamata i te faaohiparaa i te mea i parauhia e tatou.

4. Te manao tumu rā o ta ū e hinaaro ra ia ore ia aramoinahia i roto i teie nei parau no to terā e terā iteraa i te ohipa i faataahia na raua, o terā ia "manao amui" (esprit communautaire) i roto i te ohipa, e turu ai te tahi i te tahi, elaha i roto i te hinaaro-orē-raa o te tahi i te rave i ta na tuhaa ohipa, i roto rā i te rahira e i te ruraa no te otiraa o te hoè ohipa e titauhia ra i te tahi. E ere rā taua parau ra i te parau ohie...

## TE VAIHORAA MAI TE HOE MAU RAVE OHIPA I TA RATOU OHIPA I TE PU NO TE FAATERERAA...

1. Te tumu matamua e faaruē ai te feia e haere mai nei e rave i te ohipa i te pū no te Faatereraa, o te parau iho ā ia no te tauturu-avaē. E nainai

roa ia faaauhia i nià i te faito parau-tuite e noaa ia ratou i te haapiira... Riro noa atura te Etaretia ei vahi tiāraa na ratou i te hoè ohipa i rapae atu i te Etaretia e noaa ai ia ratou i reira te hoè tauturu huru ravai aè. E ere atoā hoi taua huru manao ra i te manao hape roa o tei tuāti rii i nià i terā parau na te Fatu o te na ō ra e: "E au hoi i te rave ohipa ta na utuā."

2. E tiā rā anei ia tatou i teie mahana ia faaea noā i nià i terā tiatūrihia i mataro-noa-hia e tatou i te parau e, "Te taata e haere mai e rave i te ohipa i roto i te etaretia, e ttata ia o tei haere mai e tauturu i te Etaretia (no reira eita o na e tuatapaparaa i te parau no te tauturu-avaē), e ere rā i te taata o tei haere mai ia tauturuhia atu o ia e te Etaretia! "Ia faaea noa anaē tatou i nià i te pae matamua o terā parau, terā noa iho ā ia ta tatou ohipa i te mau matahiti atoā oia hoi te maimiraa i te hoè tino api no te mono atu i te rave ohipa i reva aè nei. Te taupupū noa rā ā ia ta tatou ohipa. Ia faataa rā tatou i te hoè tauturu mai te noaa ia na i rapae i te Etaretia ia au i te faito ite-aravihi i noaa ia na, a tiatūri tatou i taua taime ra e, e mau mai taua rave ohipa ra i ō tatou nei. Tei niā vau i taua manao ra i te vairaa i teie mahana. E ere tei te moni te parau, tei ia tatou ra rā!

3. Te piti o te tumu e faaruē ai te mau rave ohipa e rave ra i te ohipa i te pū no te Faatereraa nei, o te parau ia no te tuāti-ore-raa e vai ra i rotopū i te mau rave ohipa iho e rave ra i te ohipa i te pū no te Faatereraa nei... o tei apitihia atu e te parau no te aravihi-ore o te faatupupū i te tereraa ohipa e i te mau auraa i rotopū i te mau rave ohipa ratou ratou iho e aore ia i rotopū i te mau rave ohipa e i te mau paroita e aore ia i te mau Tuhaa... Te tiāru-ri nei rā vau e, na te mau tiā o te Apooraa Rahi Amui e rave tamau ra i te ohipa e i te pū no te Faatereraa nei, no to ratou aravihi i te ite i te oraraa o ta tatou Etaretia, e faaitoito ia vai noa mai taua mau rave ohipa ra i roto i te hoè vairaa o te faatupu tamau i te anaanataa i roto ia ratou no te faaea tumu i roto i te ohipa a te Etaretia, te

anaanataa o te nehenehe e riro mai te hoè mea o te faaravai atu i te parau o ta ratou tauturu-avaē... Eiaha rā e, na ratou e faaitoito mai i te imi i te raveā e anaanataa ai e mau mai ai te mau tiā i faataahia e te Etaretia no te rave tamau i te ohipa i te pū no te Faatereraa nei! O to ū terā tiatūri-raa...

## TE TURE A TE FEIA RAVE OHIPA...

1. I te mau matahiti i haerehia mai e tatou, ua riro noa ta tatou iho mau faanahoraa tei tiatūri i te "manao faaroo" o te mau rave ohipa a te Etaretia (pipi-rometua, orometua, rave ohipa i te pū no Paofai) ei paruru no te Etaretia i mua i te hoè mau manao patoi o te hoè mau rave ohipa tei ore i farii i ta na mau faaotira. I muri aè rā i te hoè mau hororaa i faatupuhia e te hoe mau rave ohipa a te Etaretia e tae roa aè nei i teie mahana, te itehia ra ia i teie mahana te ravai-ore e aore ia te faufaa-ore o te mau faanahoraa i mataro-noa-hia na e tatou, e ore ai e tiā faahou ia tatou i teie nei ia turui noa i niā anaē i te mau faanahoraa i mataro-noa-hia na e tatou, i niā atoā rā i te ture ohipa e aratai ra i te parau no te mau rave ohipa atoā o te fenua nei, o te paruru ra i te rave ohipa e tae noa atu i te fatu ohipa. "E ere iho ā tatou i to teie nei ao, mai tei parauhia e te Fatu i roto i ta na pure tahuā, eiaha atoā rā ia moēhia ia tatou e, ua parau atoā te Fatu i muri aè e. "Tei roto tatou i teie nei ao." Terā ia to na auraa, te ture e aratai ra i te oraraa no te mau rave ohipa o te fenua nei, no tatou atoā ia, no te mau rave ohipa a te Etaretia.

2. Aitā rā taua parau ra no te ture a te feia rave ohipa i riro maitai atura ei parau fariihia e te taatoāraa o te mau rave ohipa, e tiā roa ai ia ravehia te hoè tuatapaparaa papū o te nehenehe hoi e paruru i te rave ohipa e i te fatu ohipa i mua i te parau no te hoè hororaa.

3. No reira, te Rururaa Orometua o teie matahiti i anī ai i te Apooraa Rahi Amui o te Etaretia ia faahoi faahou te toroā o te rorometua no Faaaha (Tahaa) i tapeahia aè nei e te Tomite ohipa a te Apooraa Faatere no te



I. Ihoral, président de l'EEPF (Photo M. TUPEA)

faatura-ore i te mau faaotira a te Apooraa Tiātono e a te Faatereraa o te Etaretia, o tei tiatūri atoā e, aita te mau tuatapaparaa atoā no te fifi o te orometua no Faaaha i hope i te faaohipahia e au ai taua faaotira ra no te tapeāraa toroā ia ravehia...

## TE PARAU O TE MAU HOA RAVE OHIPA AMUI I "FIFI" AE NEI...

Te fifi i farereihia aè nei e taua mau taeā ra i roto i te toroā orometua e aore ia i roto i te tau haapaarira, ei haapotara, i roto i te parau no te taviniraa, i Fetuna (Raiatea), i Tefarerii (Huahine) e i Atuona (Matuita), o tei haapeāpeā atoā i te oraraa amui o te paroita e i to ratou iho mau oraraa ūtuafare e tae noa atu i te Apooraa Faatere, te tuu ra ia ia tatou i mua i te parau o ta tatou hopoiā tatai-tahi no te apee-tamau-raa ia ratou mai te taime mai ā o to ratou faaineine-raa-hia no te toroā orometua e tae roa aè nei i teie mahana. No reira, te uiraa o te tiā ia tatou ia ui, e ere ia e, "Eaha te tumu ratou i toa ai i roto i te fifi?", o teie rā, "Eaha rā te mea i ore i ravehia e tatou no te faaineine-maitai-raa ia ratou no te toroā orometua, ia au i to tatou tiāraa hoa rave ohipa amui i roto i te paroita, i roto i te Tuhaa, i roto i te Etaretia?" Te na ō atoā rā hoi te tahi manao i roto i te Rururaa Orometua e, "Eaha atoā rā ta tatou iho tuhaa i roto i te parau o to tatou faaineineraa?" E te na ō atoā maira hoi te tahi e, "E nahea atu ai tatou i teie nei i terā mau taeā e i to tatou e i to ratou mau ūtuafare?" e te parau onono maira hoi te hoè, "A faariro anaē tatou i te fifi o terā mau taeā oro-

metua e o terā mau taeā pipi-rometua ei tumu pure na tatou i te taime no ta tatou pureraa haapaeraa maal!" Teie rā, e au anei taua manao ra no te mau orometua e no te mau pipi-rometua anaē? Te faaite maira rā taua mau manao rau ra i parauhia i te riroraa te parau no te "fifi" i farereihia aè nei e taua mau taeā ra ei parau no te taatoāraa!

## TE FAITO RAHIRAA TAATA POROTETANI I TEIE MAHANA...

1. Ua piri i te piti ahuru (20) rahira haapora e vai ra i teie mahana i Porinetia nei e ia au i te tuatapaparaa a te tahi acaē aravihi no te fenua heremani i tonohia mai e te Taatira o te mau Etaretia no Patitifa e te pū haapiira orometua no Suva (Fiji), mai te matahiti 1962 e tae mai i teie matahiti 1992, ua topa ia to tatou numera taata i raro:

- matahiti 1962	45 765 taata	54,5%
- matahiti 1971	56 286 taata	49,6%
- matahiti 1992	89 750 taata	44,8%

area te Etaretia Tatorita, ua haere ia i niā mai ta tatou e ite i muri nei:

- matahiti 1962	24 926 taata	29,7%
- matahiti 1971	39 170 taata	34,4%
- matahiti 1992	70 000 taata	35%

O te Momoni to muri mai (6%), te Atevenite (5,5%), te Tanito (3,5%) e te ite no lehova (2,5%)... I roto i te hioraa, ua haere atu ia to tatou mau taata i roto i taua mau amaa haapaaraa ra, mai ta tatou paha i ite i roto i te afata-teata i te hoè tuahine porotetani i te faaiteraa i to na manao i faa-

# peretiteni o te Etaretia

ruè ai o ia i ta tatou haapaoraa no te tomo atu i roto i taua haapaoraa tinito ra (Te Etaretia no te Faufaa Api) i tomo aè nei i ta na fare pureraa i nià i te aivi no Erima (Arue).

2. Ia riro ia taua parau ra no to tatou toparaa i raro, ei parau o ta tatou e manaono no te uui hoi i te mau tumu o to tatou pau ! Ia ore anaè tatou ia manaono i taua parau ra, te tiàturi ra ia taua taeà heremani ra e, i roto i te area e 20-30 matahiti, e hemo tatou i te Etaretia Tatorita e e nehenehe atoà tatou i te topa atu i muri mai i te Momoni e i te Atevenite oia hoi i nià i te tiàraa toru e aore ia i te tiàraa maha !

3. Eaha te mau tumu o to tatou pau ? Tei ia tatou ra ia te mau pahonora papū no taua uiraa ra. O te poritita anei i roto i ta tatou mau paroita ? O te faatura-ore anei o te mau orometua i te mau faaotiraa a te Etaretia i roto i ta ratou mau paroita ? O te rahi anei o te mau hopoià e amohia ra i roto i te Etaretia e i roto i te mau paroita ? O te papū-ore anei o te reni haapiiraa e faaterehia ra e tatou i roto i ta tatou mau paroita ? Eaha roa rā ia aramoinahia ia tatou e, i te mau vahī atoā i roto i ta tatou mau paroita, e peā-peā to reira o tei vaihonoa-hia e tatou, a tiāturi tatou e, e nehenehe te reira e riro ei arainu na te mau amaa faaroo ē ē no te umeraa i to tatou mau taata iō ratou. No reira, aita te parau no te tupu-rahi-raa o te mau amaa faaroo i o tatou nei, e riro ra ei ohipa o tei tapeā i te hoēraa no te faaroo i roto i te utuafare, ua riro rā ei ohipa o tei vavahi i te hoēraa no te tiāturiiraa e vai ra i roto i te utuafare, e tupu ai te amahamaharaa i rotopū i te metua e i te tamarī, i te taeà e te tuahine...

4. E ere rā te taloraa i to tatou mau taata te parau rū e te parau matamua, o te parau rā no te haapiiraa i to tatou mau taata i te Parau a te Atua e no te farereiraa ia ratou i roto i to ratou mau utuafare. No reira, e parau faufaa atoā te parau no te haamauraa i te pupu poro-evaneria i roto i ta tatou mau paroita. No reira, a rohi anaè tatou, e te mau taeà orometua, i te faatereraa

i te haapiiraa i roto i ta tatou mau paroita e ia riro taua ohipa ra ei ohipa tumu na tatou !

## TE HURU O TE OROÀ FATUPURAA PARAU I TEIE MATAHITI...

1. E tiā roa ia haamauruurua te taatoāraa o te mau Tuhaa i haapao maite mai ā i teie Oroā tumu i ta tatou no te tururaa i te mau tapura ohipa o ta te Etaretia e rave ā i teie matahiti o ta tatou e haere atu nei i roto ia na e i rapae atoā ia na, o tei faaravahia mai e ratou na roto i te tahi atu mau tuhaa mai te tuhaa 200, te Heremona e te Tumu Pure... noa atu ia te mau fifi matai "Wasa" i farerehia e ratou. Te hinaaro atoā nei rā vau i te haamauruuru taaē i te hōroā a to tatou mau taata e ora maira i roto i te mau motu, i te mea e, noa atu te taupupū no te imiraa faufa i o ratou, ua nehenehe ā ia ratou ia faataa mai i ta ratou mau hōroā ma te taio-ore no te mau ohipa o ta te Etaretia e tiai nei i to na mau mero i teie matahiti o ta tatou e ratere atu nei.

2. Ua maraa rii ā te parau o ta tatou Oroā faatupuraa parau i teie matahiti, e parau mau, e ere rā i te maraaraa rahi, o te faaara maira ia tatou i to tatou paha taeraa i niā i te hoē vairaa e ore ai tatou e tae faahou i niā i te huru faito no te mau Oroā faatupuraa parau i itehia na e tatou i mua ra. I roto i te tahi mau Etaretia i Europa, e mea na mua te faaara i te taata paroita i te tapura opuaraa haamauraa ia ara ratou i te parau no te hōroā o ta te Etaretia e tiai ra ia ratou i roto i taua matahiti ra. I o tatou nei, ia oti ia te aufauraa e faanaho ai i te tapura opuaraa no te haamauraa o te matahiti. Eita anei tatou e tae atoā i te hoē mahana i niā i taua faanahoraa ra e ravehia ra e taua mau Etaretia ra no Europa ?

## TE PARAU NO TE AREA E TE FAAOTIRAA HOPEĀ A TE TURE...

Ua oti taua ohipa ra i te haavahia i teie mahana e aita te pariraa i parihia ai te Etaretia e te "eā porotetani" i faatiāhia e te Ture. Te faatura nei ia tatou i taua faaotiraa ra a te Ture. O to tatou ia hinaaro mai te haamata-

raa mai ā o taua ohipa ra, ia ravehia te tuataparaa e te faatitilaifaroraa i roto i te Etaretia, eiaha rā ia amohia i mua i te aro o te Ture. I teie nei ua oti ta te Ture hōroāraa i ta na faaotiraa no taua ohipa ra, tei ia tatou ra ia i teie nei te auroraa i taua faaotiraa ra. E tae mai rā to tatou paruru i rotopū ia tatou i te mau taime i muri nei. Mauruuru i te mau Tuhaa atoā tei faatiā, ei faairaa i taua apoo ra, ia faahotuhia ta ratou faufaa e ia riro taua parau ra ei haapiiraa ia tatou i te araraa i niā i te parau no te faufaa e pūpūhia mai nei i roto i to tatou rima e te mau paroita atoā no te taaauraa.

## E TUHAA OHIPA TA TE ETARETIA I TE MAU VAHI ATOĀ E ORAHIA RA E TE TAATA.

1. I roto i te mau fifi faacaraa-ohipa i farerehia aè nei e tatou e o tei faahuehue i te oraraa o te taata, te tiāturi atoā ra te hoē pae taata e, aita ta te Etaretia e tuhaa ohipa i reira. I roto i te mau vauvauraa parau a te mau pupu i putuputu aè nei i te fare apooraa rahi o te fenua nei no te tuatapaparaa i "te parau no te imiraa faufaa e no te faahoturaa i to tatou fenua" (Charte du Développement), ua faahitipinepine)-hia te parau no to te mau Etaretia faaōraa i roto i te hoē mau tuhaa ohipa e ere i ta ratou mai te parau no Opunohu, no Mataiva, no te mau tamatamararaa atomi i Mururoa... E mau ohipa rā te reira i roto i to ratou tiāturiiraa na te poritita. Teie ia to na auraa, te mau ohipa atoā e tupu ra i roto i te fare pureraa, e ohipa ia na te Etaretia, te mau ohipa rā e tupu ra i rapae i te fare pure, e ere ia i te ohipa na te Etaretia... E ere ia i te ohipa na te Etaretia te parau no te mau tamarī tamahine e hamani-ino hia ra e to ratou mau metua, te parau no te mau tamarī e puhipuhi ra i te avaava taēro e o tei fifi i roto i te faanahoraa oraraa vaamatacinaa o teie mahana (o te haapaohia ra e e arataihia ra i ta tatou pū no "Uruai a tama"). E ere ia i te ohipa na tatou te parau no te mau pereraa moni e haafifi ra i te oraraa utuafare o te taata, te parau no te fariraa i te mau tamarī tamahine no te mau motu e haere mai nei i Papeete nei i te

haapiiraa (o te nono ra i te pū no Paofai nei), te parau no te faineineraa i roto i ta tatou mau fare haapiiraa i te oraraa no ananahi o te mau tamarī o teie fenua, te parau no Maastricht e te vai noa atura... E tiā anei ia ia tatou ia farī i taua huru manao ra ? E parau papū maitai ia e cita.

2. Na te reira e haapapū maira ia tatou i te maramarama-ore o to tatou nunaa i mua i terā parau no te tiāraa o te Etaretia i roto i to tatou fenua o te haapao, mai ia ietu i haapao, i te taata i roto i to na taatoāraa, te tino e te varua, te rapae-ara e te rotoraa toā ! O te tiāraa ia o te tiai-mata-ara.

## TE PARAU O TO TE ETARETIA AMUIRAA ATU I ROTO I TE PARAU NO TE "CHARTÉ DU DÉVELOPPEMENT"

I mua i terā parau no te tuatapaparaa i te reni aveiā no te imiraa faufaa e no te faahoturaa i to tatou fenua, o tei tiāhia atu tatou e te mau tuahine vahine i te hepetoma i mairi aè nei e o te tupu noa i roto i te hoē maoraraa hoē matahiti, ua haamauhia ia te hoē tomite nainai no te rauti no tatou i te tereraa o taua tapura ohipa ra na roto i te mau tomite rau a te Etaretia e na roto atoā hoi i te mau Tuhaa. E pahono mai ia te taatoāraa i na uiraa e hōroāhia atu ia ratou ra no te putuputuraa a te Apooraa Faatere i te avaē Fepuare no te matahiti 1993 :

A. Ma te faatura i te taata tatai-tahi o teie fenua e i roto i te manao no te hau, no te parautiā e no te Evaneria, eaha ta oe mau pahonora i mua i te fifi no te totaite-te?

E. Eaha te mau raveā e vai ra i roto i to oe rima no te faarioraraa i teie pahonora i ta oe ei fā ?

## TE PARAU NO TA TATOU MAU FARE HAAPIIRAA POROTETANI...

1-E manuiaraa rahi ā tei itea i teie matahiti i te pae no te mau hiopoāraa i ta tatou mau tamarī haere haapiiraa. Ei hioraa poto noa na tatou :

- Brevet 86,50%
- 116/134 i manuia
- Bac (TA,TC,TD) 63%
- 29/46 i manuia
- Bac (TG 3) 100%
- 1/1 i manuia

2-E tiā roa ia tatou ia haamauruuru i te mau orometua e haapii ra i ta tatou mau tamarī i Tahiti nei e i Ralatea i raro aè i te arataira a te tomite faatere o ta tatou mau fare haapiiraa ma te haamoē-ore i na taeà orometua e faatere ra i te haapiiraa faaroo i roto i ta tatou mau fare haapiiraa. E haamauruuru taeā atoā tatou ia Hilda FAIVRE vahine i rave i ta na tau faaturaraa e o tei monohia atu e Inès DUBOIS, ia Henri LENOIR e ta na pupu rave ohipa no Taravao e tae noa atu ia Michel RODIERE o te vaiho mai paha i ta tatou pū fare haapiiraa teitei no Papeete no te haere atu e haapii i te fare haapiiraa teitei no Patitifa, e o te monohia atu, mai te peu e, e tiāhia ia tatou, e Christian CHENE tane. Te parau rā no te mau metua e hinaaro ra e tuu mai i ta ratou mau tamarī i roto i ta tatou mau fare haapiiraa, aita ia e noaa ra ia tatou i te pahono, no te rahi o te tamarī...

## TE TIĀMARAA O TE ETARETIA I TEIE NEI I MUA I TE FAATAARAA TURE I TAAMU NOA NA IA NA I TE HAU FARANI...

Na roto i te aratairaa ture no te 1 no tiurai 1901, e tiā roa i te mau Etaretia atoā mai te Etaretia Evaneria, ma te tiāmā, ia faanaho i teie nei i to na oraraa mai ta na i hinaaro e ia faaore i te Tomite no te mau maitai a te Etaretia, mai te mea e, o to na ia hinaaro. Ia tuu-roa-hia rā taua faatauiraa ra i roto i te Ture Tumu a te Etaretia no te mea o te mana anaè o te Tomite no te mau maitai tei itehia i mua i te aro o te Ture. Ia ore rā te Etaretia ia hinaaro i te faaore i terā mana o te Tomite no te mau maitai a te Etaretia, te mana nei ia te Tomite no te mau maitai a te Etaretia e, e mea maitai no ta na mau faaotiraa atoā e no te mau parau atoā e tuuhia atu i mua i to na aro, ia piti aè ia tuuraa rima : to te Peretiteni o te Etaretia e to te Peretiteni no te mau maitai a te Etaretia. E faanaho faahou mai rā o ia i te hoē faatauiraa no te Ture Tumu ia itea te vai maitai roa aè no tatou i mua i teie tiāmāraa no tatou i te mau aratairaa-ture tei taamu noa na ia tatou i

te Hau farani e rave rahi matahiti i teie nei.

## TE PURE A TE FATU...

I mua i te huru no te mau ohipa rau atoā e tupu ra i roto i ta tatou Etaretia e i roto i to tatou fenua e i roto i teie nei ao, te haere mai nei teie nei "Pure a te Fatu" o tei riro ei tumu parau haapiiraa na te Rururaa Orometua o teie matahiti, e faahaamanoa ia tatou i ta tatou hoipolā i niā i te nunaa i faariorahia ai tatou e te Atua ei tiai-mata-ara, o ta tatou e here mai ta te Atua i here mai ia tatou na roto i ta na ra Tamaiti fanau tahi ia letu metia, o tei faariora hoi i te taata ei poe i roto i te mau mea atoā i rahuhia e ana e o tei riro ei manaoraara na na i te rui e te ao. Mai te anotaū mai ā o te mau mitionare e tae roa aè nei i teie mahana to tatou pure-noa-raa i teie nei pure na te Fatu, e tiā roa ai ia tatou taitai-tahi ia ui : "Te riro noa rā anei taua pure ra na te Fatu ei pure na tatou ?" e "Te vai noa rā anei i roto ia tatou terā hinaaro faatupu i te Hau o te Atua i niā i te fenua nei ?"

## EI FAAOTIRAA

Te haamanoa ra vau i terā parau no te hororaa a Petero raua o loane i te poipoi no te mahana matamua o te hepetoma i niā i te menema no letu tei tiāfaahou mai te pohe mai. O loane tei tapae na mua i niā i te menema (no to na anei api) e o Petero tei tae mai i muri aè (no to na anei paari). Te vahī faufaa rā o to loane ia tiaiiraa mai ia Petero, o to te taata api ia tiaiiraa mai i te taata paari. O te parau paha ia teie no te faaturaraa i roto i te rauraa. E ite faahou ā tatou ia raua e toopiti atoā i te faaoraraa i te pirio i mua i te uputa no te hiero o tei parauhia ia "Nehenehe". O raua e toopiti atoā i te tiātonu-maite-raa e i te faaoraraa i taua taata ra i te iōa o letu. O te parau paha teie no te hoēraa i roto i te parau no te aroha, no te faaroo e no te tiāturi-ara i roto i te parau no te taviniraa, i tupu ai te temei no te oraraa o taua taata ra ! Ia riro atoā ia tatou ei "Petero" e ei "loane" i roto i te parau no te taviniraa i pūpūhia mai e te Fatu ra e letu ia tatou paatoā. Ia ora na.

JACQUES IHORAI OR.